

# FAAFINTA RASMIIGA AH

الرسمية



الجريدة

Sannadka 15aad Muqdisho, 1da Abriiie 1987, Lambar 4

## JAMHUURIYADDA DIMOQRAADIGA SOOMAALIYA

جمهورية الصومال الديمقراطية

FAAFIN BIL SOO BAXA

جريدة شهرية

**QIMADU:** waa 5 shilin lambar waliba — **RUKUNKA:** Sanaadi waa Sh. 100 Soomaaliya gudeheeda - dibaddodana waa Shs. 300. Rubunka la weydiisto waqtiga loo gooyey waxuu ka bilaabaa 1 Janaayo. Qimaha qortitaanku F. R. halka sadar iyo waxii ka yar waa 2 laba Sh. Rukunka iyo qortitaanku waxaa la weydiistaa Laanta Maamulka Faaifinta Rasmiiga ah Lacagta waxaa lagu bixinayaa Xafiiska Canshuuraha ee Wasaaradda Lacagta.

### K O O B N I I N

QAYBTA

KOWAAD

### SHARCI

SHARCI L. 6 ee 12 Feb. 1987, Sharciga Waxba  
rashada Guud J.D.S.

BOG. 212

QAYBTA

LABAAD

### X E E R

XEER MADAXWEYNAHA JDS, L. 8 ee 20 Jen.  
1987, Magacaabid Nootaayo.

» 228

QAYBTA

SADDEXAAD

TALOOPYIN ISGAARSIIN OGE, IYO WIXII LA MID AH

MAXKAMADDA G. BANAADIR, 27.1.87, Lumid  
Buug Kayd L. 26046 ku qoran Maxamed  
Guusow Buug L. 20

**QAYBTA KOWAAD**

**S H A R C I**

Sharci lambar 7, taariikh 24 Maarso 1987  
Dhismaha Hay'adda Samafalka Dhiigga.

**MADAXWEYNAHA JDS**

**ISAGOO TIXGELINAYA** Oggolaanshaha Guddiga Joogtada ah ee  
Golaha Shacbiga;

**WUXUU SOO SAARAYAA**

Sharciga soo socda:

Qod. 1aad  
(*Dhismaha Hay'adda*)

1. Waxaa la dhisay Hay'adda Samafalka Dhiigga ee Ururka Bisha Cas ee Soomaaliyeed Heer Qaran oo hadda kaddib lagu tilmaami doono "HAY'ADDA".
2. Hay'addu waxay leedahay shakhsiyaad qaanuuni ah, waxayna u madaxbannaan tahay maamulkeeda.
3. Wasaaradda Caafimaadka ee Jamhuuriyadda Dimoqraadiga Soomaaliya waxay Hay'adda ku leedahay kormeer.

Qod. 2aad  
(*Ujeedooyinka Hay'adda*)

Ujeedooyinka Hay'addu waa:

1. Inay diyaariso kayd dhiig iyo curiyayaashiisa kala duwan oo loogu tala gelayo marka dhibaato degdeg ahi Qaranka soo food-saarto.
2. Inay ka qayb qaadato hawlaha la xiriira sare-u-qaadidda wacyiga dhiig-bixinta ee Ummadda Soomaaliyeed, si loo helo tabarucayaal dhiig.

3. Inay diyaariso baarista, tijaabinta iyo u-kala-bixinta curiyayaasha kala duwan oo ay hadba u baahdaan iyadoo la raacayo talada Wasaaradda Caafimaadka.
5. Inay sare-u-qaaddo cilmi-baarista dhiigga iyo in ay xiriir cilmi-baarisa la yeelato Hay'adaha ka jira dalka gudahiisa iyo dibad-diisaba ee arrintaas wax kala qaban kara.
6. Inay tababarro la xiriira farsamada ku-daaweynta dhiigga iyo wixii kale ee cilmi ah arrintaas ku saabsan u diyaariso takhaatiir, arday jaamacadeed iyo shaqaale caafimaad.

Qod. 3aad  
(Awoodda Hay'adda)

Hay'addu, si ay ujeeddooyinkeeda ku gaarto, waxay leedahay awood kasta ee ay ku fulin karto ujeeddooyinka ku qoran Qod. 2aad ee Sharcigan, gaar ahaan waxay xiriir hawleed la yeelan kartaa Hay'adaha Qaranka iyo kuwo gaar aha.

Qod. 4aad  
(Xarunta Hay'adda)

Xarunta Hay'addu waxay noqonaysaa magaalada Muqdisho, waxayna haddii loo baahdo, laamo ku yeelanaysaa Gobollada iyo Degmooyinka dalka.

Qod. 5aad  
(Xubnaha Hay'adda)

Xubnaha Hay'addu waxay ka kooban yihiin:

1. Guddiga Sare;
2. Guddiga Fulinta;
3. Maamulka.

Qod. 6aad  
(Guddiga Sare)

b) Guddiga Sare ee Hay'addu wuxuu ka kooban yahay:

1. Madaxweynaha JDS Madax sharaf;
2. Qof uu magacaabo Madaxweynaha JDS oo noqonaya Guddoomiye;

3. Guddoomiyaha Hoggaanka Arrimaha Bulshada ee Golaha Dhexe XHKS ama qof wakiil ah.
4. Wasiirka Wasaaradda Caafimaadka ama qof ka wakiil ah;
5. Wasiirka Wasaaradda Gaashaandhigga ama qof ka wakiil ah;
6. Wasiirka Wasaaradda Maaliyadda ama qof ka wakiil ah;
7. Guddoomiyaha Ururka Bisha Cas ee Soomaaliyeed ama qof ka wakiil ah;
8. Shan (5) Xubnood oo ah dad in muddo ah qayb ballaaran ka qaadanayey hawlaha samafalka iyo horumarinteeda oo uu magacaabo Guddoomiyaha Guddiga Sare;
9. Guddoomiyayaasha Ururrada Bulshada ama Wakiilladooda;
10. Maamulka Hay'adda - Xoghaye.

t) Xilka Guddiga Sare ee Hay'addu waa sida soo socota:

1. Dejinta siyaasadda guud ee Hay'adda;
2. Oggolaanshaha qorshaha ee Hay'adda ee uu soo diyaariyo Guddiga Fulintu, soona hordhigo Maamulka Hay'adda;
3. Kaalmo u doonidda Hay'adda.
4. Oggolaanshaha Miisaaniyadda iyo Xisaab-xirka.
5. Tallaabo ka qaadidda waxyaabaha kale ee la soo gudboon- aada danta guud ee Ha'yadduna ku jirto;
6. Guddigu wuxuu shir caadi ah isugu imaanayaa laba jeer san- nadkii, haddiise loo baahdo wuxuu isugu imaan karaa fadhi aan caadi ahayn.

Qod. 7aad  
(Guddiga Fulinta)

b) Guddiga Fulintu wuxuu ka kooban yahay:

1. Maamulka Hay'adda;
2. Agaasimayaasha Waaxyaha iyo;
3. Guddoomiyaha Guddiga Shaqaalaha ee Hay'adda.

t) Xilka Guddiga Fulintu waa sida soo socota:

1. Fulinta ujeedooyinka ku qoran Qod. 2aad ee Sharcigan iyo go'aanka Guddiga Sare (National Board and Blood Transfusion Service).
2. Dejinta Qorsho-sannadeedka ee Hay'adda.
3. Daba-galka hirgelinta qorshaha.
4. Diyaarinta Miisaaniyadda iyo Xisaab-xirka la hor-dhigo Guddiga Sare.

Qod. 8aad

(Maamulaha Hay'adda)

1. Maamulaha Hay'adda waxaa noqonaya takhtar aqoon gaar ah (Takhasus) u leh cudurradda dhiigga oo lagu magacaabay Xeer Madaxweyne;
2. Maamulaha Hay'adda darajadiisu waxay u dhigantaa mid Agaasime Guud;
3. Maamulaha Hay'adda wuxuu noqonayaa Guddoomiyaha Guddiga Fulinta;
4. Xilka Maamulaha Hay'adda waa sida soo socota:
  - b) Wuxuu fuliya ujeedooyinka Hay'adda, go'aannada Guddiga Sare iyo kan Fulinta;
  - t) Wuxuu si gaar ah mas'uul uga yahay fulinta hawl-maalmeedka caadiga ah, anshaxa shaqaalaha iyo hawlgelintooda iyo la xisaabtanka Agaasimayaasha Waaxyaha iyo Madaxda kale ee Hay'adda;
  - j) Wuxuu saxiixaa heshiisyada Hay'addu dhinac ka tahay;
  - x) Wuxuu mas'uul ka yahay hawlaha farsamo ee la xiriira dhiigga.

Qod. 9aad

(Hantida Hay'adda)

Hantida Hay'adda, waxay ka kooban tahay:

1. Wixii deeq ay ka hesho Dawladda Soomaaliyeed iyo Hay'adaheeda;

2. Wixii ay deeq ahaan uga hesho Dawladda Shisheeye, Ururro Caalami ah, Hay'ado Samafal iyo dad kale;
3. Lacagta kaydka ah ee sannad walba dhiganta;
4. Lacagta ka soo gasha hawlaha ay qabato ama hanti ay wareejisay.

Qod. 10aad  
(*Maamulka Lacagta*)

Habka Maamulka Lacagta, Miisaaniyadaha iyo xisaab-xiridda Hay'adda waxaa la raacayaa habka u qoran Ururrada Bisha Cas.

Qod. 11aad  
(*Shaqaalaha*)

Shaqaalaha Hay'adda waxaa lagu dhaqayaa Xeerka lagu dhaqo Shaqaalaha Ururka Bisha Cas.

Qod. 12aad  
(*Xiriirka Dibedda*)

Hay'addu waxay xiriirro saaxiibtinnimo, aqoon-isweydaarsi, waayo'aragnimo is-dhaafsi iyo iskaashi la yeelan kartaa Hay'ado Shisheeye iyo kuwo Caalami ah, si ay sare ugu qaaddo kartideeda dhaqaale, cilmi iyo farsamo.

Qod. 13aad  
(*Xeer-Hoosaad*)

Wasiirka Wasaaradda Caafimaadku, isagoo tixgelinaya talo soo jeedinta Guddiga Sare, wuxuu soo saarayaa Xeer-Hoosaad lagu faahfaahinaayo Sharcigan.

Qod. 14aad  
(*Burrin*)

Waxaa la burriyey Sharci iyo Xeer kasta oo ka soo horjeeda ama aan la socon karin Sharcigan.

Qod. 15aad

Sharcigan wuxuu dhaqan-gelayaa marka uu saxiixo Madaxweynaha JDS, waxaana lagu soo saarayaa Faafinta Rasmiga ah ee Jamhuuriyadda.

*Muqdisho, 24 Maarso 1987*

*Madaxweynaha JDS  
(Maxamed Siyaad Barre)*